

Ilinniartut ineqarfii pillugit Inatsisartut inatsisaat pillugu Namminersorlutik Oqartussat nalunaarutaat

Matumuuna Ilinniartut ineqarfii pillugit Inatsisartut inatsisaat nr. 42, 12. december 2019-imeersoq, Inatsisartut inatsisaanni nr. 3, 25. maj 2022 aamma Inatsisartut inatsisaanni nr. 67, 20. November 2023-meersumi allannguutitalinni nalunaarutigineqarpoq.

Kapitali 1

Atuuffissaa aamma nassuiaatit

§ 1. Inatsisartut inatsisaat maanna atortinneqassaaq attartortitsigallarnernut, ilinniartut ineqarfii, Namminersorlutik Oqartussani atugassiissutigineqartunik tamatumunnga qinnuteqarnermik tunngaveqartumik, ilinniartunut allaneersunut ineqarnissamik pisariaqartitsisunut, ilinniagaqarnerminnut atatillugu, taamaattoq tak. imm. 3.

Imm. 2. Taaguutigineqartumi ilinniartut allaneersut paasineqassaaq ilinniagaqartut ilinniarnernup aallartinnissaa sivikinnerpaamik ukiut 2-t sioqqullugit kipsisutsumik illoqarfup ilinniarfusup avataani najugaqartutut inuit allattorsimafianni nalunaarsorneqarsimasut.

Imm. 3. Naalakkersuisut pisuni immikkut ittuni, tamatumanilu minnerunngitsumik pissutsini inunnik ikiorsiinnissamut attuumassutilinni, inissaqartitsiniarnernup tamanna ajornartinngippagu, ilinniartunut avataaniit aggersuunngitsunut, ilinniartunut inissamik piffissami killilikkami ineqartitsisinnaapput.

§ 2. Ilinniartut ineqarfiat atugassiissutigineqartarpoq piffissap ilinniagaqarfusup tamarmiusup nalaani, atugassarititaasut kapitalimi 2-mi aalajangersarneqartut naammassineqarsimappata.

§ 3. Naalakkersuisut kommunalbestyrelsit isumasioereerlugit ilinniartunut ineqarfinnut malittarisassiorsinnaapput kommunalbestyrelsimit ilinniagaqartunut atugassiissutigineqartartunut ilinniagaqarnermut atatillugu, tamatumanu aamma piumasaqaatinik atugassarititaasussanillu attartornermut isumaqatigiisummi.

Kapitali 2

Ilinniartumut inissiamik atugassiissuteqartarnermut atugassarititaasut, aamma qinnuteqartunik tulleriiaarisarneq

§ 4. Ilinniartunut inissiat taamaallaat atugassiissutigineqarsinnaapput ilinniartunut:

- 1) danskisut innuttaassuseqartunut, imaluunniit nunat akornanni isumaqatigiissutit Kalaallit Nunaanni atortuutinneqartut naapertorlugit danskisut innuttaassusilinnut sanillinneqartunut, ilinniagaqartunut inissaqartitaanermut piginnaatitaaneq eqqarsaatigalugu,
- 2) ilinniagaqarnerup nalaani aalajangersimasumik Kalaallit Nunaanni najugaqartumut,
- 3) Ilinniagaqarnerisutit pillugit Inatsisaat naapertorlugu ilinniartitaanermi tapiiffigineqarsinnaasumi imaluunniit ilinniartitaanermi Naalakkersuisut ilinniagaqarnerisuteqarfiusussat allatigut aalajangersimasaani aallartissimappat ilinniarnermillu ingerlatsippat, taamaattoq tak. imm. 5, aamma
- 4) siusinersukkut ilinniartut ineqarfiannik attartornerminut akiitsoqanngitsumut, imaluunniit ilinniartut ineqarfiannik attartorsimanermut atatillugu allatigut akiitsoqanngitsumut, tamatumani aamma pisussaaffinnik sumiginnaasimanermik pissuteqartumik, ilinniartup akilersuinissamut isumaqatigiissutaasimasut eqqortinngippagit.

Imm. 2. Naalakkersuisut, tak. imm. 1, nr. 1 naapertorlugu Kalaallit Nunaannut attaveqavissuunissamik piomasagaammik saneqqutsisinnaanermik aalajangiisinnaapput, pineqarpat tikeraartutut ilinniartuq Kalaallit Nunaanni ilinniarfimmi, najugaqarnerullu sivisussusaani qaammatit 12-it qaangissanngippagit.

Imm. 3. Naalakkersuisut najugaqartuunissamik piomasagaatip, tak. imm. 1, nr. 2, sanioqqunneqarnissaa akuersissutigisinnaavaat, qularnaarneqarpat ilinniartuq Kalaallit Nunaanni aalajangersimasumik najugaqavissuusoq, naak piffissami pineqartumi Kalaallit Nunaata avataani najugaqaraluarluni.

Imm. 4. Ilinniartunut inissiamik tunineqarsinnaaneq atorunnaassaaq imm. 1-imi piomasagaataasoq ataaseq arlallilluunniit naammassineqarunnaarpata, imaluunniit ilinniartuq ilinniartunut inissiami najugaqartuq § 5-imi pineqartunut ilaajunnaarpata.

Imm. 5. Imm. 1, nr. 3 naapertorlugu ilinniarnermik ingerlataqarneq pillugu piomasagaat ilinniartuq naartunermut, erninermut meeravissartaarnermullu atatillugu sulinngiffeqarsimappat, taamaattoq amerlanerpaamik qaammatini 12-ini, atuutissanngilaq.

Imm. 6. Ilinniartut ineqarfianni ineqartup ilinniakkamik ingerlatsisuunissamik piomasagaammik naammassinnikkunnaarpata, malittarisassat tamatumunnga atuuttut naapertorlugit, taava Naalakkersuisut aalajangersinnaapput ilinniartut ineqarfianni ilinniartuq najugaqartuq piffissami qaammatit 4-t angullugit sivisussusilimmi ineqarfimmi inginnarsinnaasoq, pissutsit immikkut ittut tamanna pisariaqartippassuk, tamatumanissaaq ilinniartup uppersarsarpagu ilinniartuq ineqarfimmi ineqartuusoq, naak malittarisassanik pineqartunik naammassinninngikkaluarluni, sulii ilinniakkaminik aallussisutut isigineqarsinnaasoq.

Imm. 7. Ilinniartup toqunerani aappaasoq inooqataasorluunniit piffissami qaammatit 4-t tikillugit ilinniartunut inissiami najugaqaannarsinnaatitaavoq.

§ 5. Ilinniartuq illoqarfimmi ilinniagaqarfimini allamik inimik atugassaqaqtitaasoq imaluunniit aapparisaq inooqatigisarluunniit suliffimminut atatillugu ineqartinneqarpat, ilinniartut ineqarfianni inimik atugassinneqarnissamut imaluunniit atugarisap tigummiinnarnissaanut pisinnaatitaanngilaq. Taamaaqataanik atuuppoq sulisitsisoq suliffimmik misiliinermik isumaqatigiisummut atasumik ilinniartup atugassaanik inissiaqartitsippat, imaluunniit inimik pisariaqartitsineq ilinniartup nammineq pisariaqartitaanik aallaaveqarpat.

§ 6. Ilinniartuq ilinniagaqartunut inissiamik tunineqarsinnaajumalluni, tamatumalu atuinnaarsinnaaneranut Naalakkersuisunut nalunaaruteqassaaq paasissutissanik tamanik, inissamik tunineqarnissamut imaluunniit inigisamik tigungminniinnarnissamut pisariaqartunik, tamatumunngalu akiliuteqartarnermut pisariaqartunik, tamatumani aamma inimik pisariaqartitsinermut paasissutissanik, naalagaaffimmi innuttaaneq, inuup normuanik aamma inoqutigiinni ilaasut tamarmik atiinik, ilaqutariinnermi paasissutissat aamma inoqutigiit isertitaannik, ilinniakkamik sumi tiguneqarsimanermik, ilinniakkamik ingerlatsinermik aamma illoqarfiup ilinniarsiup avataani najugaqarnermik.

Imm. 2. Ilinniartuq ingerlaannartumik Naalakkersuisunut nalunaaruteqassaaq, imm. 1-imi pissutsini pineqartuni allannguuteqartoqarnerani.

§ 7. Naalakkersuisut aalajangersaasinnaapput malittarisassanik innersuussisarnermut innersuussinissamullu tulleriiaarisarnermut atugassarititaasunik, tamatumani aamma ilinniartunik allanik avataaneersuunngitsunik tulleriiaarisarnermut tunngatillugu.

Kapitali 3

Allaffissorneq

§ 8. Inatsisartut inatsisaat aamma malittarisassat taanna naapertorlugu suliaasut (ilinniartut ineqarfinut malittarisassat) Naalakkersuisunit allaffissornikkut aqunneqarput, akisussaasuusunit attartortitsisarnermut ilinniartullu ineqarfianni ineqarnerup atorunnaarsinneqartarneranut, ilinniartut ineqarfinut tunngatillugu malittarisassat naapertorlugit, taamaattoq tak. imm. 2 aamma 3.

Imm. 2. Naalakkersuisut tamakkiisumik imaluunniit ilaannakuusumik ilinniartut ineqarfinik allaffissornikkut aqutsineq Namminersorlutik Oqartussat iluanni oqartussaasunut ingerlatsivinnullu allanut suliassanngortissinnaavaat.

Imm. 3. Naalakkersuisut allatanik isumaqatigiissuteqarnikkut allaffissornikkut ilinniartut ineqarfinik malittarisassat tamakkiisumik ilaannakuusumilluunniit kommunalbestyrelsimut imaluunniit suliffeqarfimmut namminersortumut suliassanngortissinnaavaat.

Imm. 4. Pisortat, ingerlatsiviit aamma suliffiit namminersortut imm. 1-3-mi eqqaaneqartut, pisinnaapput 1) pisortatut oqartussaasunit ilinniagaqartut pillugit paasissutissanik aallernissamut, ilinniagaqartut ineqarfinut malittarisassat naapertorlugit allaffissornikkut ingerlatsinermut pingaaruteqartunik, aamma 2) akunnerminni paasissutissanik ingerlatitseqqissinnaapput, ilinniartut ineqarfinik allaffissornikkut aqutsinermut pingaaruteqartunik, akunnerminnilu paasissutissat taamaattut atorsinnaallugit.

Imm. 5. Naalakkersuisut aalajangersagaliorsinnaapput allaffissornikkut aqutsineq pillugu, tamatumani aamma ilusissanik piffissalersuinernillu qinnuteqartarnermi, aamma ilinniartut ineqarfinik ingerlatsinermi, tamatumani aamma imm. 1-3 naapertorlugit suliassanik isumaginninnernut, ineqartunut siunnersuisoqatigiinni sulianut immikkut akissarsiaqartitsisarnermut, aamma paasissutissanik piniartarnernut, atugassisarnermut ingerlatitseqqittarnermullu, tak. imm. 4.

Imm. 6. Aalajangersakkat pisortat ingerlatsineranni suliassat suliarineqartarnerat pillugu Inatsisartut inatsisaanni aamma pisortat ingerlatsinerat pillugu paasitinneqarsinnaatitaaneq pillugu Inatsisartut inatsisaanni atuupput, imm. 3-mi eqqaaneqartunut suliffinnut namminersortunut, taakkua Inatsisartut inatsisaat manna imaluunniit malittarisassat Inatsisartut inatsisaat naapertorlugu suliaasut naapertorlugit

tamakkiisumik imaluunniit ilaannakuusumik ilinniartut ineqarfinut malittarisassat naapertorlugit ilinniartut ineqarfinik allaffissornikkut aqutsisuutinneqarpata.

§ 9. Ilinniartut ineqarfinik allaffissornikkut aqutsinermi, tak. § 8, ilaapput ulluinnarni ilinniartut ineqarfinik aqutsineq aamma ilinniartut ineqarfiini ataasiakkaani namminerni suliassat, ilinniartut ineqarfinut atuuttut malittarisassat naapertorlugit.

Imm. 2. Ilinniartut ineqarfinut allaffissornikkut malittarisassat aqunneqarneranni qularnaarneqassaaq ilinniartut ineqarfiisa isumannaatsumik ingerlanneqarnissaat, ilinniartullu ineqarfinik ingerlatsineq sapinngisamik pitsaanerpaamik isumagineqassasoq.

Imm. 3. Allaffissornikkut aqutsinermi ineqartut soqutigisaat pitsaanerpaamik isumagineqassapput.

§ 10. Naalakkersuisut ilinniartut ineqarfikkaartumik ileqqorissaarnissamut malittarisassanik aalajangersaassapput, atortuulertartussanik ineqartunut saqqummiunneqareeraangamik.

Imm. 2. Ileqqorissaarnissamut malittarisassat, tak. imm. 1, Naalakkersuisunit akuerineqareernerminni pisortanit, ingerlatsivinnit aamma namminersortut suliffiutaannit aalajangerneqarsinnaapput atuuttussatut, tak. § 8, imm. 2 aamma 3.

Imm. 3. Naalakkersuisut ileqqorissaarnissamut malittarisassiorsinnaapput, tamatumani aamma ileqqorissaarnissamut malittarisassat unioqquatinneqarnerini kinguneritinneqartartussat mianersoqqussuteqarnikkut imaluunniit anisitaanikkut pisartussat pillugit

§ 11. Naalakkersuisut pilersissinnaavaat utaqqisunut allassimaffik, ilinniartut ineqarfiini ineqartut qanoq sivilisutigisumik ineqartuusimaneri aamma inissamik pisariaqartitsineri aallaavigalugit.

Imm. 2. Ilinniartut ineqarfiata iluani utaqqisunut allattorsimaffimmik pilersitsisoqartarpat, ilinniartut ineqarfinut allaffiup aalajangersassavai tamanullu takusassiaralugit utaqqisut allassimaffianni inissinneqartarnermut atugassarititaasut.

Kapitali 4

Ineqartut siunnersuisoqatigiivi

§ 12. Ilinniartut ineqarfiini ataasiakkaani Naalakkersuisut ilinniartut siunnersuisoqatigiivi pilersissinnaavaat, taakkualu suliassarissavaat:

- 1) aaqqissuuttarnissaat aamma agguaattarnissaat ulluinnarni ilinniartut ineqarfianni najugaqartut akornanni suliassat,
- 2) qularnaassallugu ilinniartut ineqarfianni najugaqartut ulluinnarni toqqissisimasunik killiliussanik atugassaqartitaanissaat,
- 3) nakkutigissallugu ilinniartut ineqarfianni ileqqorissaarnissaq, aamma
- 4) nakkutigisarissallugu illup aserfallatsaalinerata paarineqarneratalu ajunngitsuunissaa.

Kapitali 5

Attartornermut isumaqatigiissuteqarneq kiisalu ineqarnermut akiliummik annertussusiliisarneq akiliisarnerlu, atuineq aamma qularnaveequsiissut

§ 13. Ilinniartut ineqarfiannik attartorneq pillugu isumaqatigiissuteqarneq pissaaq attartornermut isumaqatigiissummi naqitam Naalakkersuisunit akuerisaasumi. Attartornermut isumaqatigiissummi ilaassaaq pequtit allassimaffiat takussutissiaq.

Imm. 2. Ilinniartut ineqarfianni ineqartup kingusinnerpaamik iserternermini attartornermut isumaqatigiissut atsiussavaa.

Imm. 3. Ilinniartut ineqarfianni ineqartup attartornermut isumaqatigiissummik atsiuinnerminut atatillugu ilinniartut ineqarfianni ileqqorissaarnissamut malittarisassat assilineqarnerannik tunineqassaaq.

§ 14. Attartornermut isumaqatigiissuteqarnermi attartornermut atatillugu qularnaveeqqusiissutitut qaammammut akiliutissaaq akilerneqassaaq, atugassanngortinneqartussaaq ilinniartut ineqarfianni najugaqartup ineqarfimmiit nuunnermini pisussaaffigisaanut.

§ 15. Ineqarnermut akiliut aamma qularnaveeqqusissut aningaasanut inatsimmi annertussusilerneqassapput.

§ 16. Ilinniartut ineqarfianni najugaqartop ineqarnermut akiliutissamik qaammatikkaartumik siumoortumik akiliisassaaq, piffissami ineqarnermut isumaqatigiissutaasumi aalajangersakkat naapertorlugit, taamaattoq tak. imm. 4.

Imm. 2. Akiliineq pisassaaq kingusinnerpaamik ullup akiliiffissap qaangiunnerani ulluinnaat pingajuata qaangiutinnginnerani. Ulloq maanna nalliuttuuppat imaluunniit arfininngorneruppat, ulluinnarmi tulluuttumi akiliineq piffissamik eqquisutut isigineqassaaq.

Imm. 3. Naalakkersuisut akiliiffissamik innersuussissapput, taamaattoq tak. imm. 4. Akiliiffissamik innersuussisoqarsimanngippat ineqarnermut akiliutissaaq ilinniagaqartut ineqarfinut allaffiup najugaanut akilerneqassaaq. Aningaaserivimmut imaluunniit allakkerivimmut akiliineq akiliiffissamut innersuuneqartumut akiliinertut isigineqassaaq.

Imm. 4. Ilinniartut ineqarfianni najugaqartop ilinniagaqarnerisutini pisartagaqarpat Naalakkersuisut ineqarnermut akiliut ilinniagaqarnerisutini ilanngaatisinnaavaat, tak. § 26, imm. 1, nr. 1 aamma 2 Ilinniagaqarnerisuteqarneq pillugu Inatsisartut inatsisaanni.

Kapitali 6

Ilinniartup ineqarfiata angissusissaa pitsaassusissaalu

§ 17. Ilinniartut ineqarfianni inissiamik atugassiisoqarnerani ilinniartut ineqarfianni najugaqartumut peqataasut inoqutigiit amerlassusaat sillimaffigineqassapput, ilinniartup meerai 18-it inorlugit ukiullit, aappaa inooqataaluunniit ilinniagaqarnerisutini tamanna pillugu malittarisassat naapertorlugit akiliunneqarlutik angalasinnaatitaappata, taamaattoq tak. imm. 2.

Imm. 2. Ilinniartut ineqarfianni ineqartup piumasarisinnaanngilaa ineqarfigisap aalajangersimasumik angissuseqarnissaa aamma pitsaassusissaa, tamatumani aamma nammineq immikkut ilinniartutut ineqartinneqarnissi imaluunniit ilinniartunut inissiap pequsersugaareernissaa imaluunniit pequsersugaannginnissaa, taamaattoq tak. imm. 1, § 18, imm. 2, aamma § 19.

§ 18. Naalakkersuisut ilinniartut ineqarfiannik ilinniartumut ineqartussamut atugassiissapput piffissamiit attartornerup aallartiffissaatut isumaqatigiissutigineqartumiit.

Imm. 2. Ilinniartumut inissiaq attartorfiup aallartinneqarani isumannaatsuussaaq pissusissamisoortumillu pitsaassuseqassalluni.

§ 19. Naalakkersuisut malittarisassiorsinnaapput ilinniartumut inissiap qanoq pitsaassuseqarnissaa attartornerup aallartinnerani pillugu, tamatumani aamma pequsersugaanissaanut, atortulersugaanissaanut aamma matuersaatinut tunngasuni.

§ 20. Ilinniartunut inissiaq attartornerup aallartinnerani amigaateqarpat, taava ilinniartup ineqartup Naalakkersuisut amigaataasut pillugit nalunaarfignissavai kingusinnerpaamik attartornerup aallartinneraniit ullut 14-it qaangiutinnginneranni. Tamannali atuutinngilaq amigaataasut paasineqarsimasinnaanngippata nalinginnaasumik malussarniarnikkut, tak. aamma § 37.

Imm. 2. Naalakkersuisut ilinniartut ineqarfianni najugaqartoq pisussaaffilersinnaanngilaat amigaataasunik iluarsaaqullugu, ilinniartut ineqarfianni najugaqartup iserternerminiit ullut 14-it qaangiutinnginneranni Naalakkersuisunut erseqqissaatigereersimasaanik.

Kapitali 7

Aserfallatsaaliineq aamma iluarsaasarneq

§ 21. Naalakkersuisut isumagissavaat ilinniartut ineqarfianni sumiiffiit ataatsimoorussat isumannaatsumik aserfallatsaalineqarnissaat.

Imm. 2. Naalakkersuisut pisussaaffigaat teknikkimut tunngasumik atortulersuutit, kuuffinnut, kiassarnermut, innaallagissamut, gas-imut aamma imermut atortut pitsaasumik atorsinnaassuseqarnissaasa nakkutigineqarnissaat. Assigisaanillu Naalakkersuisut pisussaaffigaat innaallagissamut ikkuffiit, naqqup sinaani iikkiussat, matserfiit, kiassaatit, ruujorit, skaaviit iikkamiittut, pequtit, atortut allallu aserfallatsaalineqarnissaat.

Imm. 3. Nutarterisarnerit imaluunniit allatut iluarsaasarnerit ajorsisoqarneratigut nungullartunilluunniit Naalakkersuisunit isumagitinneqartassapput akuttunngitsumik, pisariaqassusianut ilinniartut ineqarfiata qanoq ittuunera naapertorlugu.

§ 22. Ilinniartut ineqarfianni najugaqartup ingerlaannartumik ajoqutit Naalakkersuisunut nalunaarutigisassavai.

§ 23. Ilinniartut ineqarfianni najugaqartup pissutissaviusumik pissuteqanngitsumik Naalakkersuisut itigartissinnaanngilai ilinniartut ineqarfiannut takusaanissaannik, taakkua:

- 1) ilinniartut ineqarfiat atugassiissutigineqartumit malittarisassat uniorlugit atorneqarnersoq paasineqarnissaa siunertaralugu misissorneqarpat,
- 2) aserfallatsaaliinerup qanoq issusianik nakkutilliisoqarnerani,
- 3) iluarsagassanik suliaqarniarlutik, imaluunniit
- 4) ilinniartut ineqarfiat misissorumallugu attartorteqqinneqalinnginnerani.

Imm. 2. Misissuinermi nakkutilliinermiluunniit paasineqarpat paarinerluisoqarsimasooq, ilinniartut ineqarfianni ineqartup ingerlaannartumik ajoqusikkat iluarsaatissavai, tamanna Naalakkersuisunit piumasarineqarpat.

Imm. 3. Naalakkersuisut siumut sap. ak. 2-nik ilisimatitsillutik ilinniartut ineqarfianni iluarsaaneq aallartitsissinnaavaat. Taamaattoq Naalakkersuisut qaqugukkulluunniit siumoortumik nalunaaruteqaratik iluarsagassanik kinguartinneqarsinnaanngitsunik suliaqarsinnaapput.

Imm. 4. Suliaq sunaluunniit Naalakkersuisunit aallartinneqartoq akornuserneqanngitsumik suliarineqassaaq, sapinngisamik annertunerpaamik ilinniartunik ineqartunik soqutigittartumik. Naalakkersuisut ingerlaannartumik iluarsaaqqinnerit suliarisassavaat.

Kapitali 8

Ilinniartut ineqarfianni ineqartup ineqarfimmik atuinera

§ 24. Ilinniartut ineqarfianni ineqartut, kiisalu inuit ilinniartunit ineqarfinnut isersinnaatitaasut ileqqorissaarnissamik malittarisassanik ilinniartut ineqarfiannut atuuttunik eqquutitsissapput, tak. § 10.

§ 25. Ilinniartut ineqarfianni ineqartup ineqarfik isumannaatsumik atugarissavaa, ajoqusiinernullu taarsiisussatut akisussaaffeqarluni, nammineq, inoqutimi akornanni imaluunniit ilinniartut ineqarfiannut isersinnaatitaminiit illersorneqarsinnaanngitsumik pissusilersortoqarnerinut.

§ 26. Ilinniartut ineqarfianni ineqartup pisussaaffigaa nammineq aningaasartuutigissallugu imminut ilinniartut ineqarfiannut suliffiup nalinginnaasup avataani mattussimaguni iserniarnini.

Imm. 2. Ilinniartut ineqarfianni ineqartup ineqarfimmut matuersaat annaasimaguniuk, matuersaammut nutaamut aningaasartuutit nammineq akilissavai.

§ 27. Ajoqusiisoqarpat ajutoornikkut ilinniartut ineqarfiata ilaani Naalakkersuisut eqqiluitsuutitassaanni, ilinniartut ineqarfianni ineqartup ingerlaannartumik Naalakkersuisut tamanna pillugu nalunaarfigissavai.

§ 28. Ilinniartut ineqarfianni ineqartup ineqarfik Naalakkersuisunit akuerineqanngitsumik allamut atorsinnaanngilaa, tamatumani aamma:

- 1) ilinniartut ineqarfianni inisimasoqarluni,
- 2) ilinniartunut inissiaq allanut atugassiissutigisinaanagu,
- 3) inissiaq allanut attartortillugu, imaluunniit
- 4) ilinniartunut inissiami ineqartorlu alla inigisanik paarlaallutik.

§ 29. Inerteqqutaavoq ilinniartut ineqarfianni ineqartup Naalakkersuisunit akuerineqanngitsumik:

- 1) Ilinniartut ineqarfianni atortulersuutinik allannguisinnaanera, taamaattoq tak. § 30.
- 2) Uumasuteqarneq.
- 3) Nassarnissaat toqqortarinissaallu aallaasit ilinniartut ineqarfianni, tamatumani aamma nammineq ilinniartut inigisami. Aallaasit akuerisaasut nassarneqartut toqqortarineqassapput skaavimmi parnaartartumi Naalakkersuisuni.

§ 30. Ilinniartut ineqarfianni najugaqartoq siumoortumik Naalakkersuisunut isumaqatigiissuteqareernikkut pisinnaatitaavoq nammineq akilikkaminik atortorissaarutininik nalinginnaasunik ilinniartunut ineqarfimmi ikkussuinissaminut, internet-imut attavimmik, tv-mut attavimmik aamma innaallagissiuutitalinnik attavinnik allanik, taamaattoq tak. imm. 2. Naalakkersuisut akuersissummut ilanngullugu aalajangiisinnaapput atugassarititaasunik, tamatumani aamma atortulersuutit ikkunneqannginneranni pissutsinut utertitseqqinnissamut.

Imm. 2. Ilinniartut ineqarfianni ineqartup pisinnaatitaanera imm. 1 naapertorlugu atuutissanngilaq Naalakkersuisut nalunaarutigippassuk ilinniartut ineqarfianni innaallagissiuutit naammattumik atorsinnaassuseqanngitsut, imaluunniit atortulersuutit ineqarfimmut tassaniluunniit najugaqartunut ajoqutaassasut.

§ 31. Ilinniartut ineqarfianni najugaqartoq siumoortumik Naalakkersuisuniit allaganngorlugu akuersissuteqarfigineqartoq ikiorsiissutitut atortulersuutininik ikkussuisinnaavoq, soorlu aggersaasarnermi attaveqaatinik, usilersorfimmik pilersitsineq, uffarfimmik allannguilluni suliaqarneq imaluunniit immikkut aaqqiissusiineq, igaffik aamma matut isumaginninnermut tunngasumik inatsisit naapertorlugit. Naalakkersuisut akuersissuteqarnerminnut atatillugu piumasaqaatigisinnaavaat ilinniartut ineqarfianni ineqartup ineqarfimmi qimatsilernermini pissutsit isikkorisimasaannut uterteqqissagai, tamatumalu akuerineqannginnerani kommunalbestyrelsimiit qularnaveeqqusiissummik piniartoqarsimanissaa, pissutsit isikkorisimasaannut uterteqqinnissaannut ilinniartunut ineqarfimmi najugaqartup aninerani aningaasartuutitut matussutissat pillugit.

§ 32. Ilinniartut ineqarfianni najugaqartoq ineqarfimiit nuussinnaanngilaq siumoortumik Naalakkersuisunut isumaqatigiissuteqarani, tak. § 40, imm. 1, nr. 4.

Imm. 2. Imm. 1-imik eqquutitsinnginnermi ilinniartut ineqarfianni najugaqartoq ineqarnermut akiliummik akiliisussaataaassaaq, attartornermut isumaqatigiissutip eqqortumik piffissaliilluni atorunnaarsinnissaanik nalunaaruteqarnissami tungaanut, tak. § 36, imm. 1.

Kapitali 9

Atuisinnaatitaanerup allanut tunniunneqarnera

§ 33. Naalakkersuisut pisinnaatitaapput pisariaqartikkunikku ilinniartut ineqarfianni najugaqartoq inissamik allamik innersuussinnaallugu, annertuunik iluarsaanerik ineqarfimmi suliaqartoqassatillugu, imaluunniit ilinniartut ineqarfianni najugaqartut inoqutigiit ilaat ilinniartup ineqarfianiit nuussimappata.

§ 34. Ilinniartut ineqarfianni najugaqartoq piffissami aalajangersimasumi sungiusaammik suliffeqarallartussaaguni, imaluunniit ilinniariartussaguni illoqarfiup ilinniagaqarfusup avataani, pisussaavoq ilinniartutut najugaqarfigisaminik peqannginnermini Naalakkersuisunut atugassiinissamut, ilinniartut ineqarfianni najugaqartoq ilinniartoq minnerpaamik qaammatit marluk peqanngittussaaguni. Tamannali atuutissanngilaq ilinniartup najugaqatigisaani inoqutigiinni ilaappata meeqqat 18-it inorlugit ukiullit, aapparisaq imaluunniit inooqatigisaq, ilinniagaqarnerisuteqarnermut malittarisassat atuuttut naapertorlugit akiliunneqarlutik angalasinnaatitaasut, inoqutigiit tamarmik ilinniartup ilinniarnermut atatillugu suliffimmiikkallarnerani imaluunniit atuarfimiikkallarnerani ilaanngippata.

Imm. 2. Ilinniartut ineqarfianni najugaqartup ilinniartutut inigisaminik Naalakkersuisunut atugassiisussaq, tak. imm. 1, peqannginnermini ineqarnermut akiliuteqassanngilaq.

Imm. 3. Ilinniartut ineqarfianni najugaqartup ineqarfigisaminik Naalakkersuisunut atugassiisussaasoq, tak. imm. 1, pequtiminik Naalakkersuisut aqqissuussaannik toqqortarititsinnaavoq, ilinniartut ineqarfiat atugassiissutigineqarsimasoq atugassiinermi pequsersugaanngippat.

§ 35. Ilinniartup ineqarfia atugassiissutigalugu tunniunneqarsinnaanngilaq ilinniartup najugaqartup aappaanut imaluunniit inooqataanut, taamaattoq tak. imm. 2.

Imm. 2. Atuisussaatitaanerup allamut tunniunneqarnera imm. 1 naapertorlugu, taamaallaat pisinnaavoq nutaamik ilinniartunut inissiamik Naalakkersuisunut qinnuteqareernikkut. Inissiamik atugassiissuteqarneq taamaallaat pisinnaavoq tunngavigalugu aappaasup imaluunniit inooqataasup ilinniartut ineqarfiannik atugassinneqarnissamut piumasaqaataasunik naammassinnissimanerani.

Kapitali 10

Taamaatitsineq aamma atorunnaarsitsineq

Ilinniartut ineqarfianni najugaqartup taamaatitsinera aamma atorunnaarsitsinera

§ 36. Ilinniartut ineqarfianni najugaqartup tungaaniit taamaatitsineq sivikinnerpaamik qaammat ataaseq sioqqullugu qaammatip naanissaanut allakkatigit ilimasaarinikkut pissaaq, attartorneq pillugu isumaqatigiissummi sivikinnerusumik ilimasaarisoqarnissaanik aalajangersaasoqarsimanngippat.

Imm. 2. Ilinniartut ineqarfianni najugaqartup piffissap sinnerani ineqarnermut akiliutaasussat akilertussaavai, ilinniartut ineqarfiani najugaqartoq ineqarfimmiit nuuppat piffissaq isumaqatigiissutaasoq sioqqullugu.

Imm. 3. Ilinniartut ineqarfianni najugaqartoq inigisamiit nuuppat piffissaq isumaqatigiissutaasoq sioqqullugu, imaluunniit sulii taamaatitsinissamut piffissaliussaasoq naanngitsoq, taava Naalakkersuisut anguniassavaat ilinniartunut inissiap sapinngisamik sukkasuumik allamut attartortilernissaa. Ineqarnermut akiliutit attartortitseqqilernikkut imaluunniit attartortitseqqilertoqarsimasuuppat isertinneqartussat ilanngaatineqassapput Naalakkersuisut piumasaqaatissaanni ilinniartumut ineqarfimmiit anisumiit.

§ 37. Ilinniartunut inissiaq piffissap attartorfiusup aallartinnerani amigaateqartitserpat, tak. §§ 18 aamma 20, ingerlaannartumillu Naalakkersuisut amigaataasut iliuuseqarfiginngippatigit, imaluunniit piffissap naapertuuttup iluani iliuuseqarfigineqarsinnaanngippata, ilinniartut ineqarfianni najugaqartup attartornermut isumaqatigiissut atorunnaarsissinnaavaa, amigaataasut pingaaruteqartutut isigineqarpata. Amigaataasut iliuuseqarfigineqarpata ilinniartut ineqarfianni najugaqartup attartornermut isumaqatigiissutaasoq sulii atorunnaarsinngikkaa, ilinniartut ineqarfianni najugaqartup kingusinnerusukkat amigaataasimasut attartornermik isumaqatigiissummik atorunnaarsitsinermut pissutaatissinnaanngilai.

Naalakkersuisut taamaatitsinera aamma atorunnaarsitsinera

§ 38. Naalakkersuisut ilinniartunut ineqarfimmi najugalimmut attartornermut isumaqatigiissut imaluunniit ilinniarneq imaluunniit ilinniarfimiinneq naammassippat unitsinneqarpalluunniit imaluunniit ilinniartut ineqarfiini najugaqartoq ilinniartut ineqarfiini najugaqarnissamut piumasaqaatinik naammassinnikkunnaarsimappat atorunnaarsissinnaavaat, taamaattoq tak. imm. 3 aamma § 49, imm. 2.

Imm. 2. Ilinniakkamik, ilinniarfimiinnermik, sungiusaammik suliffeqarnermik naammassisaqarnermi, ilinniarfimmi ilinniakkamik taamaatitsineri ilinniartut ineqarfianni najugaqartoq nooreersimassaaq ulluinnat 10-t qaangiutinnginnerini, ilinniakkap, sungiusaammik suliffeqarnerup imaluunniit uninnerani imaluunniit taamaatinnerani, taamaattorli tak. imm. 3 aamma 4.

Imm. 3. Ilinniartut ineqarfianni najugaqartoq ilinniakkamiit anisitaaguni anisitaanerlu naammagittaalliutigalugu allaffissornikkut oqartussanut allanut, taava ilinniartut ineqarfianni najugaqartoq pisinnaatitaavoq inigisaminiinnarnissaminut, anisitaaneq pillugu inaarutaasumik aalajangertoqarnissaata tungaanut.

Imm. 4. Ilinniartup soraarummeerluni naggataarneranut atatillugu imm. 2-mi piumasaqaatip saneqqunnissaanut Naalakkersuisut piginnaatinneqarput.

§ 39. Naalakkersuisut § 38-mi periarfissat eqqaaneqartut avataasigut ilinniartut ineqarfianni najugaqartoq najugaqarfianiit anisussanngorlugu isumaqatigiissut atorunnaarsissinnaavaat, tak. § 49, imm. 2, ilinniartut ineqarfianni najugaqartoq allaganngorlugu mianersoqqusissuteqartoqareernerata kingorna

1) ilinniartut inigisani isumannaatsumik periaaseqarfigisimanngippagu, tak. § 25,

2) § 29-imi aalajangersakkat unioqqutissimappagit,

3) pitsaasumik ileqqoqarnissaq pissusilersornissallu periusersimanngippagit, tamatumani aamma ileqqorissaarnissamut malittarisassat, tak. § 24, imaluunniit ineqartunut allanut akornutaappat, naak pissusilersornera ingasattajaarnerunngikkaluartoq, annersaanertaqartumik imaluunniit

aserorterinertaqartumik, tak. §§ 40 aamma 41, Naalakkersuisut attartornermut isumaqatigiissummik atorunnaarsitsisinnaffigisaannik.

Imm. 2. Naalakkersuisut imm. 1 naapertorlugu atorunnaarsitsinerat allaganngorlugu suliaassaaq.

§ 40. Naalakkersuisut attartornermut isumaqatigiissut atorunnaarsissinnaavaat, tak. § 49, imm. 2, pisuni imaattuni:

1) Ineqarnermut akiliutissamik akiliisoqartanngippat, tak. § 16, imm. 1.

2) Ilinniartut ineqarfianni najugaqartup inigisani isumannaatsumik periaaseqarfiginngippagu, tak. § 25.

3) Ilinniartut ineqarfiat isumaqatigiissutaasut avataatigut atorneqarpat, tak. § 28.

4) Ilinniartut ineqarfianni najugaqartoq inigisamiit nuuppat Naalakkersuisunut isumaqatigiissuteqarani, tak. § 32.

5) Naalakkersuisunit akuerineqanngitsumik aallaasinik ilinniartut ineqarfianni toqqortaqaartoqarpat, tak. § 29, nr. 3.

6) Ilinniartut ineqarfianni najugaqartup akornusersorpagu Naalakkersuisut ilinniartut ineqarfiannut isersinnaanerit, § 23 naapertorlugu.

7) Ileqqorissaarnissamut malittarisassat ingasattajaartumik unioqqutinneqarpata, tak. § 24.

8) Atortut imaluunniit pequtit ilinniartut ineqarfianni najugaqartumut atugassiissutigineqartut attartornermut isumaqatigiissummut atatillugu sumiginarneqarpata. Tamanna aamma atuuppoq atortunut pequtinullu ilinniartut ineqarfianni inini ataatsimoorussaniittut pineqartillugit.

§ 41. Naalakkersuisut attartornermut isumaqatigiissut atorunnaarsissinnaavaat ingerlaannartumik atulertumik, ilinniartut ineqarfianni najugaqartoq pissusilersorpat annertuumik ineqarfimmut akornutaasumik, ilinniartut ineqarfianni najugaqartunut allanut, ilinniartut ineqarfianni sulisunut aamma allanut ilinniartut ineqarfianniissinnaasunut, tamatumani aamma:

- 1) ilinniartut ineqarfianni najugaqartoq annersaappat imaluunniit annersaaniarluni sioorasaarippat,
- 2) ilinniartut ineqarfianni najugaqartup pissusilersornera avatangiisuni ulorianartorsiortitsippat, tamatumani aamma sakkunik atuinikkut imaluunniit ilinniartut ineqarfiannut ulorianaatilinnik toqqortaqaqarnermigut, imaluunniit,
- 3) paasineqarpat ilinniartut ineqarfianni najugaqartoq tigumiaqartoq imaluunniit atuisoq aangajaarniutinik nakorsaaitut atorneqanngitsunik.

Imm. 2. Kiisalu aamma attartornermut isumaqatigiissummik atorunnaarsitsisoqarsinnaavoq ingerlaannartumik atuutilersumik, pissusilersorneq imm. 1-imi pineqartoq ingerlanneqarpat, ilinniartut ineqarfianni najugaqartup inoqutigisaanit imaluunniit allanit ilinniartut ineqarfianni najugaqartup ineqarfimmut isersinnaatissimasaanit.

§ 42. Naalakkersuisut attartornermut isumaqatigiissut atorunnaarsippassuk, tak. §§ 40 aamma 41, taava ilinniartut ineqarfianni najugaqartoq ingerlaannartumik ilinniartut ineqarfianniit nuussaaq, aammalu ineqarnermut akiligassat akilissallugit, aningaasartuutillu allat attartornermut isumaqatigiissummumut atasut, piffissami ilinniartut ineqarfianni najugaqartup aninissaata tungaanut atuuttut, nalinginnaasumik ilisimatitsinikkut nuunnissami, tak. aamma imm. 3. Taamaattoq pisumi namminerminni naliliineq tungavagalugu Naalakkersuisut nuunnissamik kinguartitsisinnaapput ullut 5-it angullugit.

Imm. 2. Attartornermut isumaqatigiissummik atorunnaarsitsineq pissuteqarpat aangajaarniutinik tigumiarnermik imaluunniit toqqortaqaqarnermik, annersaanermik imaluunniit tamanna pillugu sioorasaarinnermik, tak. § 41, imm. 1, nr. 1 aamma 3, taava Naalakkersuisut piumasarsinnaavaat ilinniartut ineqarfianni najugaqartup ingerlaannartumik atulersumik ilinniartut ineqarfiat qimassagaa.

Imm. 3. Ilinniartullu ineqarfianni najugaqartup aammattaq taarsiivigissavai annasaqarnerit suulluunniit, unioqqutitsinnermik pissuteqartut, tamatumani aamma ilinnartup ilinniartut ineqarfianniit anisitaanerani aningaasartuutaasut.

Imm. 4. Naalakkersuisut anguniassavaat ilinniartut ineqarfiata allamut attartorteqqinnissaa. Ineqarnermut akiliutit isertitat Naalakkersuisunut akilernerqartut imaluunniit akilernerqartussaagaluit, piffissami imm. 1-imi pineqartumi, ilinniartut ineqarfianni najugaqarsimasumut piumasaqaataasunit ilanngaatinineqassapput.

§ 43. Attartornermut isumaqatigiissummik taamaatitsinnermi aamma atorunnaarsitsinnermi §§ 38-41 naapertorlugit Naalakkersuisut pisussaaffeqanngillat ilinniartut ineqarfianni najugaqartup inissarseqqinnissaanik.

Imm. 2. Naalakkersuisut attartornermut isumaqatigiissummik ingerlaannartumik atortuulersumik atorunnaarsitsinnerminni § 41, imm. 1, nr. 1 aamma 3 naapertorlugit ilinniartut ineqarfianni najugaqarsimasooq ilinniartut ineqarfiannik attartorsinnaajunnaarallartissinnaavaat piffissami aalajangersimasumi ukioq ataaseq qaangernagu sivilissuseqartumi.

Kapitali 11

Ilinniartut ineqarfianni najugaqartup nuunnera

§ 44. Ilinniartut ineqarfianni najugaqartup ineqarfimmik qimatsinermini ilinniartut ineqarfiat utertissavaa iserternermisulli pitsaassuseqartillugu.

Imm. 2. Naalakkersuisut inigisamik qimatsinermi attartornermut isumaqatigiissut naapertorlugu qularnaveeqqusissutitut akiliutaasut atorsinnaavaat ilinniartut ineqarfianni najugaqarsimasup pisussaaffinut aningaasartuutitut matussutissatut, iluarsaanermut, attartukkap eqqiarneqarneranut, inigisamullu akiitsuusinnaasut akiitsuulluunniit allat ilinniartut ineqarfiannut tunngasut aningaasartuutiginerinut.

§ 45. Ilinniartut ineqarfianni najugaqartup nuunneranut atatillugu Naalakkersuisut inigisap misissorneqarsimaneranut nalunaarusiamik suliaqassapput, tassanilu nalunaarneqassapput amigaataasut aamma paarinerluineq Naalakkersuisut isumaat naapertorlugu ilinniartut ineqarfianni najugaqarsimasup akisussaaffigisai. Misissuisimanernut nalunaarusiaq imaqassaaq allaganngorlugit missingersuusianik suliaasanut Naalakkersuisut naliliinerat naapertorlugu ilinniartut ineqarfianni najugaqarsimasup akiligassaannik suliarineqartussanik.

Imm. 2. Naalakkersuisut patsisigippassuk amigaateqartoq imaluunniit paarinerluisoqarsimasoq ilinniartunut inissiamik qimanneqartumik, taava Naalakkersuisut tamanna uppernarsaasissavaat immikkut pappialatigut, assersuutigalugu assilisatigut, video-mik immiussakkut imaluunniit inunnik uppernarsaasuliinikkut.

Imm. 3. Kingusinnerpaamik ilinniartut ineqarfianniit nuuttoqarneraniit sap. ak. ataaseq qaangiuppat misissuisimanermut nalunaarusiaq ilinniartut ineqarfiannik qimatsisimasumut ilinniartumut nassiunneqassaaq. Ilinniartut ineqarfianni najugaqarsimasup misissuisimanermit nalunaarusiap imarisai isumaqatiginngikkunigit sap. ak. ataaseq qaangiutsinnagu ilinniartut ineqarfianni najugaqarsimasup oqaaseqaatigiumasani nassiussimassavai, taakkualu Naalakkersuisut nalunaarusiami ilanngutissavaat.

§ 46. Ilinniartut ineqarfianni najugaqarsimasoq misissuisimanermut nalunaarusiamut oqaaseqaatinik nassiussaqaangippat, tak. § 45, imm. 3, taava Naalakkersuisut pisinnaatitaassapput misissuisimanermit nalunaarusiaq tunngaviutissallugu ilinniartut ineqarfianni najugaqarsimasup qularnaveeqqusiissutaasa iluarsaanermi aningaasartuutitut matussutaatinnissaanut, tak. § 44, aammalu ilinniartut ineqarfianni najugaqarsimasup attartornermut isumaqatigiissummut atatillugu aningaasartuutaanut matussutitut atornissaannut.

§ 47. Ilinniartut ineqarfianni najugaqarsimasup kingusinnerpaamik nuunnerminiit ullut 8-t qaangiutinnginneranni allaganngorlugu Naalakkersuisunut nalunaarutigissavaa najugaq nalunaarutit il.il. ingerlatinneqartarfissaat.

§ 48. Naalakkersuisut akisussaangillat pigisanut ilinniartut ineqarfianni najugaqarsimasup qimataanut.

Imm. 2. Naalakkersuisut ilinniartut ineqarfianni najugaqarsimasumut nuussimasumullu minnerpaamik sap. ak. ataatsimik piffissaqartitsereerlutik pigisat aaneqarnissaannut, pigisat igitissinnaavaat imaluunniit tuniniarsinnaallugit ilinniartut ineqarfianni najugaqarsimasup akiligassaannik, pigisat piffissaliussap iluani

aaneqarsimanngippata. Eqqaaneq aamma pisinnaavoq ilinniartut ineqarfianni najugaqarsimasup najukkani nalunaarutiginnippagu, tak. § 47.

Imm. 3. Naalakkersuisut apeqqutaatinnagu imm. 2-mi piffissaliussaq pisussaapput pigisat annertuunik nalillit piffissami sivilisunerusumi qaammatit 3-t angullugit sivilisussuseqartumi paarsarinissaannut, ilinniartut ineqarfianni najugaqarsimasup akiligassaanik.

Imm. 4. Iluanaarutaasut imaluunniit iluanaarutaasimasinnaasut pigisat tuniniarnerisigut ilanngaatineqassapput Naalakkersuisut ilinniartut ineqarfianniit nuussimasumut piumasaqaatissaanni, pigisat toqqortarisimanerannut aamma attartornermut isumaqatigiisummik tunngaveqartumik ilinniartut ineqarfianni najugaqarsimasumit pisussaaffigineqartunut, tamatumani aamma aningaasartuutitut iluarsaatitsinermut, eqqiaanermut attartugaasimasumik, ineqarnermut akiliutissanut akiitsorineqartunut, imaluunniit akiitsunut allanut ilinniartut ineqarfiannut attuumassuteqartunut.

Kapitali 12

Maalaarutit

§ 49. Pisortanit, ingerlatsivinnit aamma suliffinnit namminersortunit aalajangiinerit pillugit maalaarutit Inatsisartut inatsisaanni § 8, imm. 2 aamma 3 naapertorlugit Naalakkersuisunut suliassanngortinneqassapput aalajangiisoqarneraniit sap. ak. 2-t qaangiutinnginneranni.

Imm. 2. Maalaarutit §§ 38, 39 aamma 40 naapertorlugit pisut aalajangernermit atorunnaarsitsissapput. Maalaarutit § 41 naapertorlugu pisut aalajangernermit atorunnaarsitsissapput Naalakkersuisut naliliinnigippata ilinniartut ineqarfianni najugaqartup ingerlaqqittumik ilinniartut ineqarfianniinnaa annertuumik inissiamut, ineqartunut allanut imaluunniit allanut ilinniartut ineqarfianniinnaasunut, tamatumani aamma ilinniartut ineqarfianni sulisunut annertuumik ajoqutaassasoq, tak. § 42, imm. 2.

Imm. 3. Naalakkersuisut malittarisassiorsinnaapput maalaaruteqartarnermut, tamatumani aamma ilusissanik aamma elektroniskiusumik maalaaruteqarsinnaanermut.

Kapitali 13

Atortuulersitsineq, atorunnaarsitsineq aamma piffissamut ikaarsaarfiusumut tunngatillugu aalajangersakkat

§ 50. Inatsisartut inatsisaat manna atortuulerpoq ulloq 1. august 2020, taamaattoq tak. § 51.

Imm. 2. Ilutigisaanik atorunnaarsinneqarpoq ilinniartut ineqarfii pillugit Namminersornerullutik Oqartussat nalunaarutaat nr. 18, ulloq 1. november 2007-imeersoq, aamma Inissianik attartortitsisarneq pillugu Inatsisartut peqqussutaanni nr. 2, 12. maj 2005-imeersumi § 3, imm. 3.

§ 51. Malittarisassat §§ 2 aamma 3-miittut ilinniartutut inissamik tunineqartarneq pillugu § 50, imm. 2-mi eqqaaneqartutut najoqqutassani sulii ilinniartut ineqarfiini najugaqartunut atuupput, ilinniartutut inissamik 1. august 2020 sioqqullugu tunineqarsimasunut. Attartornermut isumaqatigiisummik atorunnaarsitsinerni imaluunniit attartornermut isumaqatigiisummik taamaatitsinerni 1. august 2020 sioqqullugu atortuulersimasunik, ilinniartut ineqarfianni najugaqartoq ilinniartutut ineqarfimmik qinnuteqassaaq Inatsisartut inatsisaat manna tunngavigalugu.

Inatsisartut inatsisaat nr. 3, 25. maj 2022-meersoq^[i] (Naartunermi, erninermi meeravissiaartaarnermilu sulingiffeqartarnermut atatillugu ilinniartut ineqarfisa piginnartarnerat)

§ 2

Inatsisartut inatsisaat ulloq 1. juli 2022 atuutilissaaq.

Inatsisartut inatsisaat nr. 67, 20. november 2023-meersoq^[ii] (Ilinniartup toquneranut atasumik ilinniartut inaata attatiinnarallarnissaa, sungiusaammik suliffeqarallarnermut atatillugu imaluunniit ilinniariartorneq pequtugalugu peqannginnermi ilinniartunut inissiap atugassiissutiginnissaanut pisussaaffiup erseqqissarnera, soraarummeerluni naggataarnermi atatillugu nuunnissamik piumasaqaatip saneqqunneqarnissaanut periarfissaanera kiisalu oqaatsitigut iluarsinerit)

§ 2

Inatsisartut inatsisaat ulloq 1. januar 2024 atuutilissaaq.

Ilinniartitaanermut, Kultureqarnermut, Timersornermut Ilageeqarnermullu Naalakkersuisoqarfik, ulloq 12. januar 2024

Nuka Kleemann (atsior.)
Naalakkersuisoqarfimmi Pisortaq

/ Claus Kleemann (atsior.)

[i] Inatsimmik allanngineq § 4, imm. 1, nr. 3, § 4, imm. 5 aamma § 38, imm. 1-mut tunngassuteqarpoq.

[ii] Inatsimmik allanngineq § 1, imm. 2, § 4, imm. 7, § 5, § 6, imm. 1, § 17, imm. 1, § 23, imm. 1, nr. 1 aamma 2, § 34, imm. 1, oqaaseqatigiit aappaat, § 36, imm. 1, § 38, imm. 2 aamma § 38, imm. 4.

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut